



*Senin, 08 Juli 2024*

**Ogen: 2 Raja-raja 5:1-5**



**JUKUT BERSIH RAS SEHAT**



I bas paksa sigenduari, la sitik produksi-produksi kecantiken si mabai kita terbaba iklan. Umpamana produk skincare, alu erbage merk, artis si jadi bintang iklan. Menaken kin sabun, cream, tabir surya ras sejenisna, minuman ntah pe suplemen kesehaten kulit. Rikut ras tindakan perawaten facial, suntik, operasi ras sidebanna. Mbelin kal pengaruh kinijilen kulit ras tinggina tingkat percaya diri manusia khususna diberu. Mulai kin produk tradisonal: jamu, bedak dingin ras sidebanna seh ku bas produk kimia. La sitik dokter kulit ras produkna nawarken perawaten. Erbage merk ras rumah rawat kecantiken ibuka guna njabab keperluan manusia guna kinijilen kulit rikut ras kesehaten kulit e.

Tanggal 8 Juli iperingeti hari cintai kulitmu ntah pe 'National Love Your Skin day' sibahan perusahaan kosmetik 'dermastrart' guna ngajuk masyarakat erbahan perawaten kulit. Tentuna produk ras perusahaan enda turah erkiteken ngidah belinna sura-sura ras keperluan manusia kerna si enda.

Renungenta paksa enda nuriken kerna kegeluhen Naaman sekalak tentera si mbisa panglima tentera Siria. Amin mbisa ia tapi lit kekurangenna sierbahanca gulut ukurna e me lit pinakit kulitna. Paksa ia naluken Israel, itabanna sekalak anak kitik sikedungenna jadi suruh-suruhan ndehara Naaman. Anak enda me simerekomendasikan guna ndahi nabi i Samaria si banci mpepalem pinakitna, berkat ia alu maba surat pengantar i bas raja Siria man raja Israel gelah sura-surana enda banci jadi. Bagenda me belinna arapen gelah daging kulanta sehat ras bersih. Janah Dibata erkuasa mpepalemca alu caraNa. Kita manusia rusaha njagai tinepa Dibata e me kulanta enda sehat alu pangan ras perawaten. La perlu alu biaya si meherga ras produk si luar biasa tapi sehat ras bersih kulitta. Meriah ukurta terpuji Dibata.